

武定詩續鈔 十九 二十一

| |
|-----|
| 14 |
| 743 |
| 23 |



14
743
23



武定詩續鈔卷十九

利津李佐賢竹朋編輯

吳岷源

字笠江利津人

恩貢

笠江負雋才能文章制藝駢體兼擅其長詩筆翺麗吐屬清新方之近代於隨園甌北為近輩聲序羣推翹楚乃今年近知命仍困場屋殆真所謂文章憎命達耶

卮言五首

虞廷咨百工。受職不容二。孔門鑄羣賢。設科分為四。奈何後世人。兼綜天下事。朝為保障臣。暮登台鼎位。錢穀兵刑間。一人且歷試。傀儡雖登場。牽絲在胥吏。是以古官方。名實俱埽地。何如

審鑑衡。致用因乎器。大可託腹心。小亦效指臂。任久盡其才。責專行其志。將見三代風。蒸蒸臻上治。

有明數百年。取人以時藝。至今未變更。文人慕科第。及乎登仕途。精神耗半世。乃又捨所學。改途談經濟。終竟并格多。方鑿而圓柄。何如令諸生。美錦使學製。以彼作文心。改為從政計。寢饋於其中。日久悉利弊。因事思變通。不必拘成例。其有絕世才。心與古人契。人存政自舉。千年法不敝。

古人重顯揚。君臣爲大義。今人慕仕宦。富貴思美利。美利無由獲。終如魚吞餌。半生苦埋頭。甲科倖得意。一粒大海中。廿載尙

需次。祿薄餬口難。飢驅長安地。奔走趨要津。銷磨壯士志。及得宰一方。逋負如山積。上官視眈眈。魚肉日相伺。不爲猛虎苛。必爲碩鼠食。若慕廉潔名。將有子孫累。長歌可憐蟲。爲下英雄淚。宰官應列宿。其職最親民。官卑任自重。所貴得其人。吏部操選柄。探符爲平均。暗中相摸索。賢否混等倫。外用歸藩鎮。責在封疆臣。雲泥太懸絕。相知恐未真。何如委守牧。一一使陶甄。人少易辨識。地近詳諮詢。明試視以功。觀過知其仁。與爲鶴性傲。勿爲燕雀馴。歡迎如郭伋。攀留如寇恂。簡任協輿誦。何患吏不循。古人談地利。城池恃甲兵。而今百里邑。兵只十餘名。一旦萑苻

起百人可橫行。奈以數萬命。託之於書生。書生無以守。一死效忠貞。死亦無所益。徒張寇威聲。團練與召募。望氣已心驚。是以守土吏。陷害如秦阮。所宜重兵權。邑設千軍營。跳梁有小醜。頃刻疾雷轟。兵多難議餉。分田使躬耕。庶幾兵農合。么麼不足平。

解嘲

吕后母天下。意屬辟陽侯。關盼一愛妓。十載燕子樓。問名殊貴賤。核行別薰蕕。蘇武羈匈奴。十九年嚙雪。胡婦生兩雛。眷戀難爲別。有宋忠簡公。忤秦受嚴譴。九死不移心。萬里納黎倩。奇尤矜大節。浩氣塞宇宙。兒女情偏長。相思拋紅豆。豈若假清流。言

行飾且書。客氣銷中途。屈身由狗竇。

登華山

策馬過太行。默領看山景。中岳雖巨鎮。如文欠奇警。陡然見三峯。橫絕天外嶺。賈勇躡躡升。漸次入佳境。崎嶇世途險。寸步不敢騁。梯雲似登天。捫石復下井。仄徑不容足。垂厓難引領。烟雲擾天風。陰晴換俄頃。未暮現星河。俯臨夕陽影。黃河一綫明。蜿蜒東西永。梁晉與咸秦。一覽極三省。只惜怯高寒。未敢凌絕頂。生平止半途。事事與此等。

馬嵬坡

隨園咏馬嵬詩。但令姚崇還作相。君王妃子可長生。有
意爲美人出脫。但姚宋而在。楊妃安得入宮。丙辰冬路
過馬嵬。爲伸其意。

大哉唐天下。豈無眞美人。十載青宮婦。一旦充下陳。魚網鴻則
罹。彼獨非人心。衮衮惜朝士。諫牘寂無聞。萬幾荒歌舞。千金買
笑顰。羯奴更私寵。妃傷指爪痕。穢聞流中外。憤怨噪三軍。紅顏
絕尺組。玉骨埋沙塵。何如入宮始。一死報君恩。千年馬嵬驛。詞
客議紛紛。隨園排衆論。不欲請至尊。亦不咎妃子。只歎無良臣。
豈知不兩立。愛倖與忠勳。前殿有姚宋。後宮無隗秦。不見開元

歲有妃如太眞。

留侯祠

漢代數名臣。子房負重望。前繼姜尙父。後匹諸葛亮。三人細權
衡。奚啻牀下上。渭水與隆中。耕釣事高尙。後車三顧恩。知遇相
頡頏。及策佐命勳。才俱兼將相。敬勝授丹書。二表不相讓。子房
匹夫勇。一椎試博浪。倉猝遇沛公。韓彭無殊樣。謂其相業隆。主
德晚逾放。謂其武功多。未將兵將將。生平最著功。借箸籌策壯。
從此滅六國。報韓心誰諒。躡足耳語時。齊王命已喪。次第功狗
烹。大禍自茲釀。圯橋見無人。受書半虛妄。黃石及赤松。詭語尤

欺誑丈夫重出處。進退義有當。何必託神仙。反類鬼域狀。一笑問君侯。非敢故訕謗。

南廣道中。澗水清淺。爲亂石所激。聲聞數里。詩以誌之。

流水志江湖。一氣思奔注。亂石尼阻之。橫身當去路。詎知奔波性。浩然留弗住。兩兩相敵當。激成水勢怒。因作不平鳴。勃谿雜咒詛。浙江喧夜潮。匡廬飛瀑布。我昔浮東海。涵天觀大度。萬壑納無聲。汪洋渾如故。奈何勺水多。聲響轉無數。細思知物理。一笑蹶然悟。在山泉水清。半是虛聲誤。

秦臺懷古

六王擒出烟塵裏。北築長城十萬里。朝歌暮舞阿房宮。從此秦皇不欲死。大徵天下求方士。果有神仙來徐市。奏稱海上三神山。千年仙藥靈芝紫。童男童女三千人。泛水揚帆去如駛。豈料仙人更譎詭。有意欺弄秦天子。珠沈大海無還期。從此秦臺賦經始。臺上東望蓬萊宮。不見蓬萊見烟水。歸去不作飛仙遊。骨敝形銷長已矣。百二河山棄敝屣。賸有此臺尙秦氏。項羽火燒不到此。一坏黃土巍然峙。翠華駐蹕何處是。蟠蒲青青草靡靡。斷井頽垣認舊址。殘碑模糊不可視。斗酒縱觀秦代史。種種狂癡難屈指。坑殺儒士私心喜。燒毀詩書仇故紙。驅車策馬來戾

正定詩續金
五
止。輕裝挾書爲行李。便擬登臺朗誦起。願借東風西去吹入秦皇耳。

棣郡文廟古槐歌

人言萬物都烏有。除卻虛空無不朽。我謂此論殊不然。培養靈根恐未厚。君不見學宮古槐樹。周模孔楷同永久。一株獨立櫺星門。三株殿前若比耦。亭亭昂首干九霄。鬱鬱橫身蔭十畝。香葉鏤玉花垂金。鐵幹崛強色老醜。深夜時有鸞鳳棲。風來能作蛟龍吼。我疑此物生不偶。栽培始自何人手。素王或者來遊時。春風化雨已親受。至今槐蔭在鯉庭。七十二子神呵守。根盤東

魯尼山中。枝覆青齊渤海石。因材而篤聖人心。遂得其名與其壽。幾回問汝汝不言。渾身破裂如張口。

題堯雨生畫帳蝴蝶

一年一度好春光。一度春光夢一場。不夢黃梁夢蝴蝶。人間夢好數蒙莊。只愁夢好易爲醒。春帷不見蝴蝶影。何如妝成蛺蝶圖。留將夢境作真境。是夢是真兩不知。花飛蝶舞向羅幃。主人愛花兼愛蝶。催索阿儂豔體詩。儂思蝴蝶花鄉住。夜合花前連理樹。惜玉憐香事等閒。愛花不顧羣花妒。胡不飄然向漢院。習習香魂拂團扇。瓊林玉樹醉和春。夢逐金鶯舞飛燕。爾乃寂寂

伴冷齋。膽瓶花插丁香開。池塘春夢謝家草。蝴蝶詩成鳳字牌。
我憶當日唐宮裏。曾放探花蝴蝶使。一見瑤臺解語花。春風聞
煞春駒子。六宮空悔夢繁華。飛入羅浮仙子家。舊夢欲尋無路
入。至今身在碧廚紗。誰知乃是龍眠搨得滕王帖。芙蓉帳上千
蛺蝶。輕描金粉淡描鬚。著紙欲飛神欲活。水晶如意翠金翹。斜
挂銀鉤垂絳綃。鴛夢初回燈影小。仙仙似訝羽衣飄。湘簾屬耐
朝慵捲。寶鴨濃熏香正暖。莫教蝴蝶逐香飛。花裏尋春春不管。
春去春來花與共。花落花開蝶如夢。何如留此帳中春。欲入甜
鄉蝴蝶送。送人蝴蝶夢中遊。蝶自雙飛花並頭。莫使漆園仙吏

知此意。恐教栩栩遽遽化爲蝴蝶不復化莊周。

輓李烈婦

邑人李孚先。少年雋才。縣試冠一軍。忽一病不起。妻張
氏誓以身殉。其父母慰留之。氏曰。女上無翁姑。下無子
女。偷生人間。豈非贅疣。夫方瞑目。氏亦雉經。可謂從容
就義者矣。詩以輓之。

黑雲壓屋鎗光綠。風雨打窗鬼夜哭。他生未卜今生休。夫君雖
死難瞑目。握手彌留將永訣。寡鵠離鸞不忍別。不能同生願同
死。君心抑鬱向誰說。君爲疾死疾無名。妾爲義死非爲情。上無

翁姑下無子。子然一身忍獨生。君之未死妾心憂。痼疾纏綿何
日瘳。妾如能死君心喜。九原聚首夫何求。死而有知能相見。承
歡長伺舅姑面。一家從此大團圓。得死爲難生轉賤。予迴百轉
腸暗結。涕淚俱乾泣飲血。八尺絲縲繞畫梁。引頸投繯命斷絕。
不惜花殘與月缺。不數鏡清與玉潔。比翼鳥連理枝。以此擬之
都不屑。魂魄疑爲冰霜雪。心肝化爲金石鐵。主持風化重綱常。
奏入 天庭褒義烈。吁嗟巾幗一幼娥。詩書雖讀亦無多。慷慨
一死泰山重。頑懦起立志不頗。不識談忠說孝文學士。欲報
君恩立節當如何。

和黃少初送別詩原韻

代

恨識初平晚。相逢已白頭。名空巴子國。才擬武鄉侯。黃多才。能爲自行車。
詩筆峨峯峭。詞源峽水流。何堪離別意。一日似三秋。
百萬貔貅老。東南轉餉艱。鹽梅思借箸。鎖鑰肅重關。籌筭錙銖
外。風帆指顧間。世平無暴客。橐載絕雄奸。

蟻戰三十韻

螻蟻緣何事。紛紛苦用兵。蠻疆同決戰。蠶食效爭衡。昧爽良辰
屆。陽和傍午晴。樓臺森對壘。瓴甓倚長城。堆垤量沙積。餽囊戴
粒盈。檄文馳鳥篆。戍鼓聽蛙鳴。紅攪飛花陣。青盤細柳營。銜枚

憑疾走。結草礙遐征。蛛網張三面。螿弧拔一莖。預知天雨洗。豈望海風驚。銜尾多多善。當頭恰恰迎。虬蟬初得勢。鷓鴣怕聞聲。絳木元駒逸。揚塵赤駿輕。秦民千隊集。槐國一時傾。蝸角回身觸。螳車奮臂撐。相持如鷸蚌。恣噬似鯨鯨。虎旅偕蠅舞。龍驤逐蚓行。羽林飛將健。咽路伏軍精。探穴搜羣子。封丸踐舊盟。螢明疑火烈。蚊聚駭雷轟。拳石依山險。杯池背水贏。潰隄攻有術。繞樹遁無情。敗識全軍墨。歸尋九曲程。股傷奔足緩。啄息伏尸橫。蠢動渠魁獲。么麼小寇平。磨旋催凱奏。土闢喜功成。珠線邀奇賞。羶腥慕大烹。螭螭開絕塞。蚪蚪紀勳名。夢已南柯醒。觀從北

壁清。甘霖來頃刻。好與慰蒼生。

白雪樓懷古

文章清節雨茫茫。白雪樓空貯夕陽。一代才名高七子。千篇詩律冠三唐。同聲婁水非標榜。大敵虞山任鼓簧。寵絕侍兒何處所。蓮花猶似舊時妝。

武侯祠步范始元明府原韻

偏安久息蜀江波。羽扇猶麾殺賊戈。卅載馳驅終恨少。一生心血已無多。勳名太重文章掩。籌策雖高運數過。割據紛紛天意定。那容公作漢蕭何。

大星驚落蜀西空。遺愛千秋禱祀同。絕世奇才仍謹慎。古來名士儘推崇。早從離亂知真主。莫以興亡問上穹。帷幄於今需國手。臥龍誰是草廬中。

題唐菊村鷄肋集

唐揚州人高才未第以州佐需次成都時權鹽場大使亦非李杜亦非韓。矯矯吟場樹一壇。六代江山容嘯傲。九州烟雨助悲歡。豈須仕宦才名重。慣耐清貧詩骨寒。漫把斯編擬雞肋。餘香猶有萬人餐。

結轡名場二十年。英雄末路有詩編。豈真才子須登第。從古詞

人盡謫仙。白雪合吟巴客地。青蓮同唱夜郎天。願君傾倒囊中句。莫負益州十樣箋。

明湖題滿百花洲。選入詞曹四照樓。君昔年曾仕山左。有題咏明湖諸作。已刻入山左試牘。循吏清風留渤海。前身明月憶揚州。鄉心空惹千山夢。鹽菜同看萬井收。可有佳章重惠我。浣花谿上又回頭。

和堯雨生感懷原韻 鈔二

萬山突兀小窗前。百感蒼茫落照邊。難遣客愁多磊塊。不聞家事亦神仙。更無古蹟談前代。愛結新知證夙緣。見說夜郎斯地近。三生只愧李青蓮。

寒林竹樹半蕭疏。雲影山光共一廬。避世無嫌侵瘴癘。誤人何
敢怨詩書。離懷未飲醒如醉。操術誰分匠與巫。回首廿年增舊
感。故吾曾否是今吾。

疊感懷前韻。卽贈李丹山留別。

春思發向百花前。連日吟情落酒邊。蝴蝶畫成疑夢幻。丹山善畫蝶
鴛鴦別久悵遊仙。現身莫問三生事。凝意還期再世緣。願乞如
來瓶底露。楊枝酒徧萬紅蓮。
蓬萊迢遞隔紅塵。誰識前身與後身。富貴何曾關福命。窮愁未
必屬詩人。放懷時覺乾坤小。到處相隨風月親。聞道玉皇香案

吏自卿謫後更無臣。

蕉窗細雨夜燈疏。傳舍容身愛此廬。開篋暫存新得句。懷人重
檢舊來書。浮生看破何須卜。貧病難醫不問巫。同是天涯淪落
客。憐渠心事卽憐吾。

谿聲不斷日潺湲。似我閒愁緒未刪。杜宇催歸嗁夜月。桃花含
笑下春山。客逢同調難分手。酒入離腸易上顏。欲去留君君且
住。鄉心漫放五湖間。

贈別李丹山

半是詩仙半酒仙。隴西重到李青蓮。蓉城未識三生恨。萍水相

逢萬里緣送客遲懸高士榻知君穩上孝廉船春心似解留人意細雨如絲掛柳烟

如斯才調似相如駟馬題橋徧蜀都愧我更無堪贈劍懷人先約後來書夢留蝴蝶重逢處山記鳳凰送別初話到名場增舊

感廿年曾作化龍魚丹山將歸應湖南秋試

雨後嵐光兩岸青大江東下快揚舲好風宋玉歌巫峽明月君山過洞庭四載重還遊子夢五湖高仰少微星芳名再見知何處金粟花香干佛經

留春不住送春行屬耐春陰換老晴卽景詩聽鶯語和落花風

趁馬蹏輕千山來路從頭認一曲陽關結尾聲巴雨蠻烟江上路勸君珍重故人情

又別丹山

同是天涯淪落人用香山句相逢萍水問前因來尋舊雨添新雨無計留春轉送春他日難期離合夢長途珍重苦吟身此行江上多詩料一路青山黛色新

送春得春字

一聲聲報曉鐘頻悔把韶光苦認真可奈無情惟過客果然有腳屬陽春易醒原是繁華夢難挽渾如薄倖人我欲問君何處

去東風已動馬蹏塵。

瓶花

楊柳瓶中仙露華。夜深忽放一枝花。乍來金屋原驚寵。初入蓬壺尙憶家。筆架豔疑才子夢。鏡臺妝伴玉人斜。春寒江上卿知否。幾樹隨風落晚霞。

牡丹

十二欄干簇絳霞。春光老去轉風華。仙人愛住樓臺上。國色偏生富貴家。樂府歌成都擱筆。洛陽歸後不看花。尋常難得天香抱。寄語狂蜂莫放衙。

柳眼

絕世風姿孌娜身。何堪阿堵更傳神。嬾看前路離家客。預識來年及第人。掛樹月明頻照鏡。隔牆花好欲窺隣。蛾眉自有天然態。縱羨西施莫效顰。

眼鏡

凡身未到水晶宮。雙鏡懸來境忽同。愛讀虞書明四目。何多項羽盡重瞳。繁華過眼浮雲在。秋水凝神薄霧融。底是無花不須汝。少年偏學白頭翁。

仿隨園咏物九章 鈔五

鏡

前身明月舊精神。化作團圓千萬身。滿面妝花能肖我。有心如水是斯人。隨形變態君誠幻。及第空談事未真。悟到磨甄思退步。回頭顧影迹俱陳。

簾

月光偷入混燈光。疏影難留一瓣香。裏面看人原易了。橫身當路自成行。斜依朱戶情終薄。回望程門恨轉長。欲引春風來座上。銀鉤高挂讀書堂。

牀

生涯半世厭琴書。惟有甜鄉睡味餘。福淺並教無好夢。病多翻幸得安居。雙雙栖穩鴛鴦處。栩栩飛來蝴蝶初。何事元龍爭上下。黃梁一覺總成虛。

燈

小窗初罷讀書聲。一穗搖紅夢未成。籠入輕紗偏透露。擎來暗室倍分明。有花空報何須喜。此味雖知說不清。歌舞場邊風雨夜。輸君領畧箇中情。

杖

函丈而今離故羣。扶人處處效慇懃。同行先到常輸汝。待叩無

緣轉憶君。每掛百錢沽肆酒。嬾隨雙屐踏春雲。化龍如有將來約。太乙然藜繼夕曛。

明湖竹枝詞

湖上人家住畫樓。湖中漁子盪輕舟。四時風景江南似。合把湖名換莫愁。

朝烟暮雨淡前汀。落盡楊花長綠萍。蒲笋蘆芽荷蓋小。春城併作一痕青。

綠水青山尙儼然。濟南名士散寒烟。惟餘湖上三秋柳。曾見漁洋最少年。

歌聲四面水中央。花裏風來人語香。欲采紅蓮須款款。恐驚葉底睡鴛鴦。

蓋 錡

字毓奇。蒲臺人。春舫公子。增貢。咸豐辛亥保舉孝廉方正。以知縣用。

春歸

埽徑送春歸。春歸在何處。花開蜂子來。花落蝶兒去。

秋夜不寐

萬籟中宵靜。風寒漏送聲。天高星轉小。雲淨月孤明。人影當秋

正定詩續金
瘦。鄉心入夜清。蟲吟無賴甚。故作不平鳴。

村居雜詩 鈔一

西風纔罷奏。竹外日將斜。老樹稀殘葉。疏籬露晚花。荒烟橫野岸。秋色到田家。霜信來偏早。寒光噪暮鴉。

閒居

小院青苔長。蟲飛繞絳紗。移簾風動竹。拂袖雨沾花。燕子營新壘。蜂奴放晚衙。消閒無箇事。亭畔日初斜。

遊玉清宮諸處雜詩 鈔一

佛法輪迴信有諸。誰能返溯到當初。天邊缺少常盈月。人世終

多未見書。夢想莊生忘化蝶。情知惠子樂非魚。死生晝夜同消息。一任浮雲過太虛。

閒中作

淵明瀟灑步兵狂。遊戲如君各不妨。有酒莫辭今夕醉。著書應笑古人忙。心無可念耽沈睡。氣果能平學坐忘。身外浮名原贅物。破除煩惱入清涼。

壬寅友人邀賞春梅卽席口占

昨夜東風閣外新。香從雪裏見精神。山中甲子渾忘卻。開到梅花便是春。

戊申題長江畫冊

一幅烟雲萬里開。江山縹緲見雄才。袖中誰說乾坤小。攜得東南半壁來。

游百川

字匯東。濱州人。同治壬戌進士。現官編修。記名御史。

過都門見挽粟車

清路爭驅馳。輿馬何喧闐。熙熙穰穰客。往來磨其肩。中有挽粟車。車重挽不前。氣吁喘吳牛。顏如火始然。汗雨淅淅滴。驕陽正午懸。運輸艱若此。矧乃農力田。君子享萬鍾。得勿凜素餐。如何

光明燭。但照綺羅筵。

哭杜左泉師

不墜青雲志。高風獨慕真。緣慳遊宦日。愁老著書身。政論崇崔寔。憂懷託杞人。稿遺長恨在。展卷淚盈巾。

任魁揚

字占一。利津人。同治壬戌併辛酉科舉人。

遣興並示同學

別院茶烟裊篆長。披襟暫納午風涼。隨時展玩詩書畫。偶欲清談佛老莊。愧我未焚閒筆硯。爲人又作嫁衣裳。燈前消夏仍勤

武定詩續錄
課轉憶槐花舊日忙。

遊錦秋湖

錦秋湖畔最情牽。一櫂衝開萬頃烟。雅集幸同書畫舫。清遊欣
上孝廉船。薜蘿村舍看垂釣。鷗鷺人家喜設筵。更有荒祠堪寫
句。摳衣便欲謁三賢。湖畔有三賢祠

張衍熙

字子緝。海豐人。始園公子。咸豐丙辰進士。現官戶部主
事。

題王忠簡公祠

妖星夜落大如斗。天險居庸關不守。舉烽一夕動虬邊。乘輿忽
傳下殿走。尙書嶽嶽能知兵。抗疏嘯咷驚儒生。馬邑羸師方示
弱。燕幕豈知巢欲傾。嬖倖在側忠逆耳。皇天不祚竟有此。臣謀
不用臣節成。不欠英皇惟一死。懷來城下天如穹。鐵騎斫陣疾
於風。銜鬚竟作溫都尉。衣血猶留嵇侍中。古云挈辮無輕假。誰
倒太阿授謁者。嗟嗟振肉豈足食。可憐忠義膏原野。沙磧北望
霜風高。白骨何處迷蓬蒿。只今祠內雙古柏。夜夜寒空作怒濤。

閒居

滿目饒秋光。秋花帶草堂。徑常緣客埽。人爲作詩忙。觴咏多佳

武定詩續錄
趣琴書有古香。曲欄時一倚。老樹帶斜陽。

城樓夕眺

徙倚城樓薄暮望。無邊秋色正茫茫。墨翻野寺鴉千點。書寄雲
天雁一行。青翠麥苗初過雨。槎枒林木飽經霜。炊烟隱隱出村
落。幾處人家住夕陽。

王榮烈

字炳文樂陵人。葦樓公子。諸生記名知府殉節。贈道。

濱州杜筠巢少司農王觀察傳君有勇畧咸豐甲寅
銜兄雲楣出守歸德君隨任乙卯捻匪犯郡君佐守禦
城賴以安撫帥敘功以教諭註選檄帶勇攻破雒河集
諸賊巢保知縣戴藍翎擇精悍五百人練成勁旅以黑

布裏頭號黑頭軍為賊所憚歷出師穎毫蒙宿間解
山城圍追勦至馬石坪疾占山口賊上山乘勢下撲乃
密遣炮隊至山後擊其背賊敗敘功留豫以直隸州用
庚申攻破李河溜賊巢勦賊於古橋豫境肅清專疏薦
舉記名知府八月追賊至野竹岡賊眾數萬官軍寡不
敵眾全軍失利君受傷落馬復裹創血戰大呼殺賊賊
狼鬪遂遇害事
聞交部優卹

趵突泉

鑿得雲根一派連。平將萬斛湧珠泉。浮花合擬詞源瀉。發雪應
殊瀑布懸。小住有人閒浣筆。朗吟此地駐飛仙。濟南絕似江南
好。不數中冷第一泉。

趙維昀

武定詩續錄

卷十九

字勻田利津人子英從姪附貢

步月懷蘇長公

明月似水流蕩漾秋波冷中有荇藻交乃是松柏影世無髯翁筆誰摹此時景俯仰企高賢於焉煩慮屏

張葆恩

字守泉利津人麗斗子同治甲子舉人現候選知縣

同杜同之表叔遊古寺作

梵宮深鎖寂無聲取徑逶迤傍水行偶遇高僧聊共話初經古寺不知名談禪客去參餘味結伴人來憶舊盟莫笑蓮鐙貧未

續松梢露出月華明

李蘭谿

字荔村商河人同治壬戌併辛酉科舉人

酌突泉

七十名泉此最名靈源鎮二起濤聲倒翻廬瀑花三尺長湧江潮月一泓霖雨何曾天際落風雷宛在地中行仙家蓑枕今休借恐破黃梁夢不成

高式銘

字子箴利津人諸生

冬夜

料峭風尖透敝廬。一鐙相伴課三餘。窗留竹影雲常護。居有梅花月可鋤。飲酒不辭同輩後。論文想到古人初。遙思灞岸敲詩客。冒雪衝寒策蹇驢。

武定詩續鈔卷二十

利津李佐賢竹朋編輯

王會英

字薇卿。利津人。廩貢候選訓導。

戴西岑李偉卿各以菊數種惠贈。疊前韻申謝。

富易起人怨。貴易招人讟。矧茲富貴外。擅此清閒福。戴李吾兩友。天生是使獨。娛性移泉石。怡情栽花竹。娟娟綠荷淨。戢戢林筍束。傍砌多種蘭。緣徑每蕪菊。佳麗滿目前。綺繡照金谷。恍意入仙居。形容令我俗。每當過訪暇。私憾未能伏。思欲攜長鑱。偷

向階前。歸來掩柴荆。逾覺饒涎觸。細字寫紅箋。告以情所欲。
與我固爲榮。弗與亦非辱。故人何慷慨。指贈同困粟。花擔趁輕
盈。一朝來何速。銀籤各標名。佳友非一族。鄙人喜過望。不覺笑
捧腹。遂令隱逸態。光輝生茅屋。閒理舊日觴。預製重陽服。待得
秋日開。與君稱鼎足。

三兒行示兒輩

大兒鼾睡呼不醒。小兒齟齬笑聲。次兒以手指畫肚。飽啖藜
藿腹。彭亨。但見景升兒子。一一皆豚犬。那得孫堅兒子。如猗如
虎。擅英名。東坡曾有言。養兒願聰明。盜跖之先。有柳下。不應難

弟並難兄。我不敢望。荀氏一門。德星聚。亦不敢望。仕宦顯赫。聯
簪纓。但願愚者讀書劣者耕。乃父之言。汝試聽。嗚呼。乃父之言。
汝試聽。

題高麗中味蓼軒詩集

江湖滿地正橫戈。擾擾浮生一夢過。亂後家山驚破碎。愁中風
雨助吟哦。聞仙詩句。聳身久。賈誼文章。奈命何。從古才人多不
遇。蒼茫搔首觸悲歌。

守歲

家家臘酒喜開筵。堪歎浮生未了緣。老不貸人惟白髮。寒能伴

武定詩經
我是青鸞。深閨短夢。鏡搖壁。客路歸心。箭在弦。多少悲歡難細
數。屠蘇一醉。又明年。

聞柝

殘柝聽將盡。曹騰旅夢長。誰言爲客久。一夜數還鄉。

夢王子文

枕畔雞聲聽喔咿。黑雲埋徑雨絲絲。燈花爛漫初成穗。宛似西
窗翦燭時。

王藻英

字椒菴。號春麗。利津人。薇卿弟。廩貢。

夜泊蒲關

夜久風露零。殘燈明古渡。撲刺宿鳥飛。斜月滿村樹。

病起同諸子登濟南城樓

連朝風雨病維摩。閒向城頭載酒過。北去河聲吞地盡。南來山
色上樓多。飄零作客蘭成賦。搖落悲秋宋玉歌。愧乏終軍請纓
志。金陵望淚滂沱。

贈關小山

去年聯袂客燕京。瑁燥秋風取次行。舊雨重來尋酒約。寒燈昨
夜訂詩盟。時結二菴詩社園樓庾信非無意。小山館予小園中榻下陳蕃最有

情。余至齋中小山敘罷蘭言閒悵望。一輪明月滿前楹。

夜坐遣懷

孤燈紅穗落遲遲。寂寞蕭齋夜讀時。病似茂陵常解渴。瘦同賈島也敲詩。慣彈魚鉢愁憐我。要度鴛鍼乞向誰。昨日家書新寄到。鄉關一夢醒如癡。

峭山亭

灤水迴環歷下城。高高亭子白雲橫。荷風入座空中色。松雪當年畫裏情。塔院丁東檐馬響。禪林斷續木魚聲。推窗時向東南望。萬疊青山潑眼明。

花朝由灤晉省車中口占

青山無數亂雲橫。芳草萋萋送客程。正是濟南風景好。杏花天氣近清明。

濟河晚眺

清河北去海門長。薄暮行人渡口忙。安得郭熙新畫稿。圖成一幅水雲莊。

趙德樹

字子楨。利津人。附貢。候選訓導。

博興道中

兩水明如鏡。中央引路長。山迎人面笑。風送馬蹄忙。農事分紅
稻。漁家傍綠楊。清歌何處起。疑是采菱航。

秋日遊明湖

遊蹤畫舫幾回經。秋柳蕭疏歷下亭。遠岸光浮霜露白。濼波影
浸離華青。明湖斂澹平於簞。古堞玲瓏列若屏。小立吟哦詩未
就。一聲鴻雁起蘆汀。

高彤琦

字鳳岡。利津人。次封子。廩貢。

飲趙余田書齋

綠樹陰濃滿院清。珠簾不捲篆烟橫。琴書有潤時當午。翰墨流
香雨乍晴。灑落堪傾名士酒。殷勤誰勸小鬟爭。年華逝水須行
樂。莫任繁霜兩鬢生。

高彤瑄

字叔玉。利津人。次封子。同治壬戌併辛酉科舉人。

暮春

東風簾幙靄斜暉。芳草鋪茵綠漸肥。九十韶光彈指去。楊花滿
院作團飛。

題畫美人

迷離春色拈紅豆。歷亂閒愁縮綠楊。獨立苔階渾不語。昨宵有夢到漁陽。

劉義齡

字邃年。利津人。淑來公從曾孫。廩貢候選訓導。

戲作討蚊詩

百物胥養人。魚蟲列食譜。不料蚊么麼。竟以人為脯。黃昏鼓噪來。不速客入戶。逢人便置喙。晏然食不語。茹毛兼飲血。素風仍太古。但知食之甘。不思受者苦。文人方讀書。蘇子痛刺股。佳人偶披襟。楊妃驚傷乳。小則為癢痕。疴癢澈心膂。大則為瘡痍。肌

膚且潰腐。其細雖已甚。其毒乃如許。憤極舉義旗。誓將大討汝。欲服渠魁心。先將罪狀數。晝伏而夜動。爾狡抑似鼠。飛而能食肉。爾凶又如虎。吳猛扇不搖。孝于爾忍咀。高郵露筋祠。爾忍嚙貞女。詩人白香山。瘡痍使痛楚。鴻儒劉夢得。利薺畏爾鉅。人馬億萬計。紛紛民如豕。始也張虛聲。羣醜恣嘯聚。繼也鳴得意。雜呼伴侶。雖云眾鳥合。三軍帥無主。滿地起黃巾。英雄難用武。無奈作檄文。徧投豸蟲部。蜂王率中軍。蝶使結後伍。蚓其如龍驤。蠅則為虎舞。拔旗整鬢弧。含沙蜮飛弩。蜘蛛張網羅。螳螂揚巨斧。背水蟹橫戈。作氣蛙鳴鼓。穴鬪蟻排陣。火攻螢列炬。蠻觸

聯犄角。蟻螟翦黨羽。六月始興師。自茲漸徂暑。奮擊聽晚雷。洗
兵藉秋雨。九月十月交。凱旋早振旅。一律喜肅清。高枕慶安堵。

河上晚眺

夕照紅遙岸。人爭渡口船。潮隨新月上。帆共落霞懸。鴉背翻殘
陣。漁歌破晚烟。黃流何日息。濯足羨清漣。

明湖晚眺

波光如鏡浪如花。小立湖邊夕照斜。慘綠枯荷留宿鷺。深黃老
柳帶棲鴉。閒情幾處尋漁釣。秋色雙尖認鵲華。興到不嫌風露
冷。更浮明月泛仙楂。

隆煥章

字堯文利津人諸生

早起

甜鄉夢忽醒。殘月低戶小。看月起開門。明河澹欲曉。蕙風吹衣
輕。薇露盪手早。萬籟俱無聲。此境出塵表。

落葉

黃葉蕭蕭下未停。孤燈夜雨不堪聽。書窗卻愛新晴後。添得駒
光上短檠。

吳重憲

字仲懌號杖客海豐人子苾子同治壬戌併辛酉科舉
人候選郎中著檻紅仙館吟草

西橋訪雨賦九言體

炎盛爍爍避暑無林泉解衣臥榻欲眠不得眠海濱匝月祈禱
苦無雨安得急溜噴薄檐端懸遙憶西橋千樹萬樹柳春時曾
見點點飛輕絲天瓢儻許借我一傾瀉潤青溼翠入望凝秋烟
相與載酒憩息林樾下清風習習定許生淪漣旬旬忽聞雷聲
走天末羲輪無力漸看濃陰連精神頓爽急呼疲蹇至披篔簹荷
笠一路揮吟鞭襟袖淋漓溼透不暇顧但見青條出沐紅欄邊

長虹臥波溟濛飛野鷺濃陰貼樹搖曳嘶鳴蟬水面惺忪亂跳
圓暈破枝頭點滴時有涼風穿塵疴一經洗滌盡忘却不覺四
圍暮色來蒼然須臾阿香停車風伯止但餘雲霞萬色呈新妍
金泥銀爛奇詭不可狀花者玳瑁紅者臙脂鮮魚鱗千疊變幻
忽破碎蔚藍一角劃出斜陽天歸路不愁泥深恐沒胷放將半
鉤新月明娟娟

送張甥雋谷隨侍長安

草草理征鞍高歌行路難送君千里別秋色滿長安關壓河聲
壯雲開華影寒賞音從此去古調爲誰彈

秋菊爭持蟹。春燈聽賣煙。再逢嘉會日。應動故鄉情。黃葉殘唐塔。桃花古漢城。舊遊重過此。鴻爪尙縱橫。

由濟南赴泰安途中作

我來恰好說桑麻。菜圃瓜田歲事賒。豆葉黃於新釀酒。柿園紅似晚開花。野碑按讀文詞斷。店壁尋詩墨瀋斜。莫怨客窗岑寂甚。前途相餉有烟霞。

七夕

笙歌瓜果薦新秋。兒女家家望玉鉤。囑咐深閨休乞巧。讓他良夜話離愁。

春明紀遊題榆堡壁

陶然亭古壓城隈。招友同登最上臺。隔著碧紗窗六扇。蘆花風捲笑聲來。

孫墨園

字翰西濱州人諸生

雨後城頭眺遠

雨歇平原暮。城頭屐齒經。霞烘殘照紫。雲逼亂山青。一水看明滅。孤村入渺冥。溪橋歸去路。片月下漁汀。

秋日送友人南歸

武定詩續鈔

卷二十

涼風吹遠木。斜日淡寒山。別我正秋色。送君還故關。路分黃葉外。夢繞白雲間。他日重相訪。還應識舊顏。

閨怨

無情一輪月。偏照妾牀前。不管人離恨。清宵只自圓。

李勤

字子襄。利津人。諸生。

遊濟南書院懷李偉卿

書窗燈火佛樓東。書院西有壽佛樓兩載論文几視同。此日思君懷舊雨。當年坐我憶春風。牆頭竹蔭為誰綠。水面荷花依樣紅。轉盼

秋闈重聚首。相邀聯步入瞻宮。

杜翹

字桐巢。濱州人。次屏公孫諸生。

寄王子武索詩

不讀君詩久。懷君感索居。豈無花寄興。應少吏催租。數載交情重。三秋客夢孤。拋甄期引玉。濡墨幾踟躕。

河西隴和王季眉舍人韻

和風淡宕送征鑣。曉過連雲十二橋。歲月無情空浪擲。家山有夢感迢遙。相逢驛路思梅使。慣繫幽情是柳條。一語寄君君記

武定詩續錄
十
否再遲三日卽花朝

偶成

京華小住卽爲家。鎮日題吟手自叉。更有東風能解意。殷勤吹放碧桃花。

杜庭琛

字芸臯濱州人筠巢子

恩賜進士官編修。加侍講銜。

寒風歌用東坡聚星堂詠雪韻

蕭蕭颯颯飛寒葉。凜冽朔風冷欲雪。乍聞動竹復穿林。一庭幽籟彌清絕。老幹蚪盤忽怒號。撼屋掀牆檐欲折。俄驚黃沙捲地

來。虛窗鐙影半明滅。琴弦冷澁彈不得。寶劍昂藏凍難擊。引杯恰有酒盈尊。膽瓶又見冰花纈。銅壺漏滴寂沈沈。撚髭低吟生玉屑。春光秋月幾何時。逝水年華真一瞥。家人圍鑪坐永宵。談笑還將往事說。遙憶關山征戍人。應怨嚴霜滿甲鐵。

重陽前日遊天靈寺。預爲登高之會。卽席口占。

古寺尋幽去。登臨愜詠觴。千山明遠黛。一塔挂斜陽。輦飽纔中酒。清歌亦擅場。拈花還自笑。身世兩相忘。

寒夜用徐雲士韻

夜讀一鐙青。梅花冷更馨。凍雲鎖寒月。枯樹掛明星。小閣雞催

正定詩集卷之十一
曉。虛齋鶴聽經。枯吟危坐久。孤影自亭亭。

贈別張星謀外弟

羨君才調重青錢。共視連牀一快然。纔喜簪花傳妙筆。那堪折柳贈離筵。小窗月冷青燈夜。野店風淒白露天。記取三春來有信。歸鴻書寄落霞邊。

和張星謀外弟見憶詩韻

金石論交文字緣。更從魚雁得吟箋。有懷風雨人三兩。悵隔關河路幾千。別久每教詩代話。離多但覺日如年。何時更翦西窗燭。空對斜陽一惘然。

雨後枕上口占

昨宵春雨正絲絲。一枕黑甜夢醒遲。爲怯曉寒還懶起。偎衾閒續夢中詩。

張守虔

字星謀海豐人。子靜子。同治甲子舉人。現官中書。

送存甫兄之清河

已作他鄉客。那堪更送人。柳攀無賴綠。花餞可憐春。南浦魂初斷。西堂夢未真。菊開曾有約。何日雁來賓。

憶杜芸臯表兄

三秋尚記整歸鞍。時節匆匆春又闌。易水萍蹤隨浪轉。長安花
事讓君看。爭禁別緒牽縈苦。無限詩情寫寄難。待到菊開曾有
約。東籬載酒共盤桓。

中秋與諸弟小集

燕山別去再經年。故里重來感舊緣。春草池塘疑夢裏。秋窗風
雨話燈前。暫歸翻似萍蹤寄。小聚惜非棣萼聯。時諸兄多不在家今夕

與君須盡醉。明宵人月兩難圓。次日即回保陽

伯仲壘簾迭唱酬。家山惜不久勾留。百年若夢誰先覺。十日爲
期又遠遊。新歲團團柏葉酒。年前尙擬歸里重陽辜負菊花秋。近來深

解田園樂。詎羨班超萬里侯。

吳峴

字庾生。海豐人。長飴子。同治乙丑進士。現官禮部主事。

張烈婦行

厭次古郡今樂陵。鬲津之水環其城。其俗樸而知禮。其人秀而
英。有名進士史炳符。閨中女子嫻禮儀。其夫張樹榕。吾姑之長
子。咸豐丁巳季夏來結褵。維時張子病已久。殘冬未盡遭陽九。
張子歿。女心摧。含貞茹苦柏舟詩。奉親四載禮無違。隨宦在關
中。姑病復不起。小姑髮垂肩。三叔並玉立。欲死不得哭吞聲。強

撫叔姑和娣姒。突如烽火奔鎮安。賊勢潮湧城孤懸。城中老幼無守志。紛紛逃竄。或如逸獸如驚湍。署有古井。冰霜鑑影奮袂。一揮千鈞力。猛拯以椁。繼以緘。波心扶起神嚴整。再投再曳。勸不已。嗚呼。兵接公堂矣。陰風號天欲泣。貞魂耿耿葬寒碧。夜半賊馬奔城南。其仲樹杰伏河隄間。回看青燐大如瓊。下有殘燄萬點簇擁山之巔。吁嗟乎。匹夫殉國靈不滅。況乎婦也。大貞大孝大忠烈。一城節義共九原。譬如衆星戴明月。孰非率土孰空桑。君親大義置若忘。女年廿二短折耳。詎知萬禩流馨香。儒冠巾幗共闡此。無乃愧作心徬徨。其叔樹權亦人傑。髫年赴國難。

慷慨臨大節。長矛刺賊櫻賊鋒。賊退兩日猶見目皆裂。樹杰去年來爲我道之聲悲咽。作歌紀實詔來葉。誰其上之史。成爲具牒。

季光甲

字殿卿。利津人。附貢。現官戶部員外。

春園漫興

小園花事儘堪詩。較量春寒每繫思。好是新晴風力軟。猩紅點上海棠枝。

裴淦

字匯浦利津人云亭子諸生

借寓

借寓書齋僅半間。筠牀紙帳愛幽閒。徑荒未種花三面。窗小剛容月一彎。偶對殘棋消白日。時裁短幅畫青山。紅塵盡被疏簾隔。縱設柴門不必關。

詠蝶

粉點銖衣勝翦裁。飛花落絮共徘徊。化身那得輕如許。應自南華夢裏來。

閨秀

劉春儀

字蘭隱濱州人官虞城知縣嘉隆公女莒州學正李公

圖南室封孺人著辭雪編菊窗咏張學文云菊窗工吟咏兼精水墨花卉卒年二十九郡志載之列女有詞一卷最佳暮春風

并卒年二十九郡志載之列女有詞一卷最佳暮春風

漸茶藤粉褪楊柳烟殘試聽黃鸝細語似說與三疊陽

關傷情處一谿流水幾點青山潺湲武陵解艇直載

得春歸何日重還任簾移花影繡譜慵看生怕又留愁

住梳洗罷懶畫眉鸞空惆悵雙鴛屏斂明月樓閒

春點絳唇云鳩嗁鶯轉曉來夢斷愁無數清明已去那

更多風雨飛盡楊花都是無情絮春何處隴雲烟樹恰

是春歸路

春日

獨眺南樓目杳茫。幾行征雁起瀟湘。一江春水愁深淺。萬壑離
雲夢短長。寂寂庭分花雨細。蕭蕭檻倚竹風涼。青禽若解人腸
斷。莫向窗前報海棠。

邵氏

商河人

家世未詳詩見

國朝閨秀正始集

閏七夕

今夕復何夕。相離指一彈。前言猶在耳。別淚未曾乾。天上填橋
易。人間寄鏡難。果能頻得巧。不厭倚闌干。

馬毓瑛

商河人。惠安知縣淮公女。仲牧公姪女。早卒。

詠柳桃戲示婢子

柳枝桃葉總情關。伴我蘭閨解笑顏。紅點臙脂青掃黛。芙蓉嬌
面蹙春山。

張琳

字怡梅。濱州人。武舉人官鬱林參將鳳翔公女。王子武
室例。封孺人。著怡梅詩存。

閨情

花影彈鏡中。宵深自爾汝。脈脈緘幽情。心與口相語。金錢卜遠

武定詩續金
人窗外瀟瀟雨

初至葵邱署中早起

喔喔聽雞鳴。梳掠一何促。喚婢且低聲。樹杪見寒旭。門未啟高堂。行行且復止。枝上白頸烏。啞啞已哺子。

孝婦行爲呂氏嫂賦

我生自孩提。阿嫂如阿母。撫育等恩勤。女誠時在口。婉婉復何知。旣長傾心久。吾父悲無兒。猶子繼厥後。冀其宜室家。從此添健婦。婦道旣克修。所適悲非偶。綠衣兼終風。嫡位成虛守。及父官桂林。繫裘隨左右。慈親病垂危。哺肉甘親受。感此誠孝心。奏

效同國手。奉養終天年。父官甫解綬。天涯賦歸來。椒花頌杯酒。佳婦勝佳兒。亦足慰衰朽。皇天胡不仁。父運厄重九。遘疾及彌留。垂泣顛星斗。刺血瀝眞誠。乞代增親壽。禱祀乏通靈。含殮無或苟。絕粒何從容。相隨歸隴畝。哀我生非男。抱恨慚高厚。和淚紀孝行。報顏呼負負。藉以發幽光。綽楔或稱首。採風俟輶軒。載筆書某某。

夢遊黃山得羅字韻一聯醒後足成之

黃山風景未全訛。化蝶遽然喜再過。樹映霞光紅似茜。水明山色碧於羅。詩情頓覺年來減。畫意偏從夢裏多。記得當年遊此

地。雛鬢已自解吟哦。

送夫子之汴州

噲。吟遙送隔林鐘。料理征衣意萬重。最怕深秋風雨夜。半窗鐙
火說離悰。

臨別牽衣傍客車。來年歸計定何如。長途此際多紅葉。早寄閨
中一紙書。

題晚香女史繡餘吟卷

清於冰雪燦於霞。詎比調朱弄粉家。最是怡情江上句。耐寒和
月折梅花。

倦繡餘閒卽唱酬。閨中靜好自無尤。從來清福人間少。笑問芳
卿幾世修。

和夫子新安道中見寄元韻

別君落葉蕭蕭候。倏送春歸綠滿枝。生把相思分兩地。關山殘
月上鐙時。

齊東道中

麻姑堂外柳絲斜。茅店蕭條四五家。一路鈿車香碾處。和烟和
雨病桃花。

野花折取兩三枝。不忍輕拋插鬢絲。引得侍兒誇解事。回頭含

笑道相宜。

王慕貞

字浣花。四川人。諸生。春帔女。濱州太學生。胡瑞雲繼室。

拜月

淡妝向月深深拜。惟與嫦娥心意會。細語喃喃人不聞。凝神小立花陰外。

詠筆

妙絕生花筆。含毫思邈然。陣開披錦繡。墨落滄雲烟。管子胸成竹。毛君硯是田。笑他班定遠。底事漫相捐。

元旦卽事

雞鳴卽起肅新妝。紅燭當筵夜未央。娛老吉言教小弟。承歡笑語慰高堂。薄才敢擬椒花頌。密意先焚柏子香。但祝椿萱身各健。團圓渾忘在他鄉。

七夕

天上猶難報七襄。人間乞巧笑匆忙。女牛一樣謀生拙。十萬金錢無計償。

范氏

霑化人。蘇山公本生子。遴修女。利津高次封子。現官永

定河工縣丞彤紱室例 封孺人

河署憶家

離家歲客已頻更。一縷愁思兩地縈。活活桑乾河畔水。流來不作故鄉聲。

暮春偶成

彩鴛繡罷起調鸚。輕燠輕寒向午晴。就裏不知春晚晚。柳花如雪撲簾旌。

張氏

濱州人官施南同知積祺女蒲臺蓋式如孫昌恒室。

春閨

陣陣香風撲畫樓。桃花零落任飄流。傷情怕聽呢喃燕。喚起春閨無限愁。

春日歸省道中口占

征車輾轉出春城。野鳥聲聲喚曉晴。翠柳千條日卓午。碧桃花外有人耕。

秋夜思家

深閨靜夜幾徘徊。一面軒窗對月開。雁影橫空憑借問。香奩曾否帶書來。

武定詩續鈔卷二十一 李氏家集 卷二十二以下俱

李愉

先高祖字庭怡號又和利津人增貢官至江油知縣

郡志循良傳愉任昌邑教諭時值學宮傾圮即率紳衿修理廟貌聿新又捐俸獨修崇聖祠並創修學署考課勤敏雅意作人廉靜和平以德行先事載昌邑志俸滿送部引見廷試條奏詳明擢四川江油縣知縣陋規盡革一毫不取杜絕情託苞苴不行清慎勤敏案無停牘邑無冤民至代理平武署直隸茂州理煩治劇亦盡除風弊所至有廉明聲後告病回籍士庶攀轅載道為去思碑歸里宦橐蕭然杜門教子非公不至公門睦族人

武定詩續鈔

卷二十一

利津 張 銓翼南選訂 李佐賢竹朋編次

濟州威謙恭和藹閩邑推為典型○海陽族姪承芳明
府李君傳公廷試擢江油知縣與公同試者十六人
惟公蒙特恩焉其在江油也白馬路番目寶且與陝
人鬪死奸人亡去番民訟之大吏務為其復仇不然將
啟豐公奉委馳抵其地拊循有方番人帖然事遂寢西
川地廣人稀稅畝積久未清奉敕丈度公親歷田間
雖簿籍不假胥役嚴防擾民皆感激自首無隱匿者
公處事不矜才而卒能允當多類此○吾家於明代自
棗強遷居利津世列膠庠四世祖見田公諱登仙精數
學能前知人無貴賤皆呼為李仙傳嗣是任宦累代繼續先
及朱太史李副使所撰神仙傳是任宦累代繼續先
高祖庭怡公乃見田公之曾孫也自先世多勵學不
人知故詩之傳留者亦少僅
得庭怡公一首以冠家集

白帝城懷古

烟靄蒼茫裏登臨白帝城江浮新雨漲山疊亂雲生三顧真知

遇千秋仰大名縱橫餘八陣遺恨總難平

李含章

族叔曾祖字荆巖號介亭先高祖從姪嘉慶戊午順天
鄉試舉人

東津曉渡

烟水何蒼茫東津問古渡曦馭升扶桑舟子已無數
人沙灘驚眠鷺雙槳帶雲飛劃破船頭霧帆從畫裏懸
中顧聒耳欵乃聲不辨來與去誰是乘槎客借問天上路

醉後作

武定詩書少

卷二十一

二

正定詩集卷二十一
一舉累十觴。放達聊適意。醉倒臥前楹。醒來渾不記。搔首且狂歌。逍遙人間世。萬象羅心胸。頓覺乾坤細。

渠展懷古

桑田變滄海。海上沙磧終不改。滄海變桑田。田畔斥鹵千萬年。有客有客來訪古。表海雄風不再覩。緬懷管子霸圖強。經綸籌畫海可煮。煮海爲鹽利斯普。祇今惟賸茫茫土。嗚乎魚鹽之利能幾何。何如常留功德與民歌。

香篆

金猊寶鴨鬱焚香。裊裊青烟引篆長。未必清心能入妙。偶然寫

意欲成章。連環不斷添波折。幾縷無端入杳茫。儻使書空成近體。平安兩字細推詳。

黃金臺

昭王雅意築金臺。舉國爭看樂毅來。伯業一空遺迹在。荒荒落日冷蒼苔。

李源

族伯祖字巨濤。號雲鶴。先高祖從姪孫。乾隆己丑進士。官至邵武知縣。著雲鶴詩存五經說約四書考疑歷代

紀元寓拙軒稿。

郡志文苑傳源博學能文申乾隆己丑會魁官福建邵武知縣庚子充鄉試同

考官所取多知名士著有五經說約四書考疑寓拙軒稿行世。○聞雲鶴詩存之詩間有借刻他氏者今年遠已無從鑒別然全唐詩中往往有一詩分屬兩人者儻有他集互見亦無妨並存也

閩谿灘

初登清流船。船小妨內聲。一龕不盈丈。兀兀坐卿酉。經過火燒灘。灘淺尚難受。此地昔嶮峽。山根蟠地厚。傳聞用火攻。石爛洩水口。一綫鑿峽門。乖龍渴欲吼。榕城百水驛。磚碗十八九。直宜舍舟楫。復事牛馬走。何事冒重險。曠日更持久。似磬衆灘石。力聚堆一門。甯知跬步間。灘轉石愈繁。大者各磊落。五岳分雄尊。小者縱橫列。八陣連雲屯。此方昔割據。局促開

乾坤。霸氣鬱未消。石怒猶併吞。撫茲二長歎。恃暴安足存。

水石自相鬪。直立高於屋。我舟擲水底。低受浪不足。若逢吞舟魚。突過滿魚腹。驚雷雜風雨。眩轉失耳目。一躍出重圍。天晴山水綠。

山形乍開豁。灘怒似少息。蕩漿聊伊啞。夷猶弛腕力。我亦覽幽賞。微吟意稍適。有石聲砉然。忽破船底入。水面石可防。水中石難測。君子慎履坦。其旋庶元吉。

造舟爾何人。斲木如紙薄。常恐遭魚龍。未足當一攬。豈知逢擊觸。善受賴柔弱。百折付一權。繞指霹靂作。彎環象運鼻。屈曲蛇

赴壑招招真吾友。性命印汝託。

黯淡灘

朝踏建谿雲。暮看延津月。六時迅郵籤。出沒蛟龍窟。巨灘名黯
淡。行者悚毛骨。奪人有先聲。十里聞恍惚。近觀更駭然。白浪湧
銀闕。篙師轉捩捷。如彼刃新發。後勁應前茅。相比蛭與蟹。亂槳
打中流。一一肖狐搢。枉矢投哨壺。其間不容髮。又疑糠粃簸。旋
作鳧雁沒。抑若仰者三。雉堞現突兀。終日戒衣袂。前車鑿銜榘。
入坎滅頂凶。惟慎乃無蹶。忠信涉波濤。名言昭如揭。

咏史

豫子稱國士。三晉屠智伯。孔明王佐才。後主終銜璧。荆軻事不
成。燕丹患轉劇。留侯博浪中。一擊非善策。英雄值數窮。跬步歎
跼蹐。世人觀成敗。紛紛置訶責。卓哉介之推。深山自滅迹。狐趙
亦何能。貪天爲己力。

髡徒膺上賞。賈豎縮通侯。一飯羅五珍。車前鳴八駟。咄咄作氣
勢。赫赫震交遊。豈無當世賢。抱關伏下流。揚子悲執戟。馮生困
白頭。魏匏嗟寡用。荆璧傷暗投。獨醒滋物議。危行致譽尤。允矣
脫塵鞅。俛仰無所求。

古意

皎皎天上月。云是萬里隔。清光一迴照。乃復如咫尺。
雪彼池中藕。藕心千萬絲。此絲雖云微。纏絲無已時。

鬪蟋蟀

微物爾何知。應候發聲響。聒耳苦未休。靜夜增情悵。癡兒不解
事。尋搜徧區壤。偶然弋獲之。歡聲已鼓掌。盛以雕筠籠。覆之洞
戶網。飲飼適所宜。情性揣相仿。云此善攻擊。攘臂殊慨慷。鼓綏
忽交鋒。叱咤聲兩兩。健者氣無前。監腦更扼吭。田單火曳尾。狄
青銅作穎。直擣步伐齊。再接爭雄長。諸侯壁上觀。五色亦迷罔。
頃之息鉦鏡。論功急行賞。勝者建纛牙。負者棄榛莽。堪笑賈秋

壑著經明且朗。更籌帷幄中。選將登場上。賈蟋蟀
經中語遊戲恣談兵。
胡不勤埽蕩。方今戢邊患。承平久有象。蠕動本無競。作何爭戰
想。局中樂不疲。我見心養養。

石梁瀑布

未到方廣寺。早聞震雷轟。徒侶競告語。石梁瀑布句。趨就曇華
亭。目眩心神驚。截業千仞崖。飛流天外傾。崩浪滾洪濤。洶湧翻
鯢鯨。濺沫寒人肌。萬籟俱息聲。鳥鵲空中避。疋練挂霓旌。危橋
凌險立。孤挺無支撐。廣厚僅逾尺。戰慄誰能行。信哉混沌鑿。不
關人力營。卽此仙凡隔。何須問蓬瀛。

華頂

山行蕩塵襟。疑在浮雲表。逶迤前經進。奇峯更天矯。春暮雪猶積。凌空絕飛鳥。俯視萬八峯。兒孫環膝繞。呼吸通帝座。海天一望瞭。蒼涼拜經臺。遺址尚未杳。惜無棲止所。頂上祇茅棚一候座尼僧居之看扶桑曉。

鬪鶴鷄

有鳥陌上時婆娑。笙簧那及鸚鶯歌。日鷲日鷄均此族。南方星紀取名多。鷄首鷄尾鷄火南方星名厲疾彷彿伴鷹隼。譬人好勇矜馮河。少年喜事競掩取。于囊之飾紈綺羅。鄭重奚啻軒乘鶴。珍愛無異

錦蒙駝。終宵拳握坐待旦。轉盼窗影昇羲娥。躍踰鋪地兩雄決。爪距便疾金蛇過。或鳴得意或竄伏。亦有躍出餘空窠。介雞之智儻類是。招釁速禍將如何。不如脫手縱飛去。隨所飲啄眠芳莎。機心永息遊寥廓。化為祥鳥相鳴和。

象棋和韻

人情詭譎如雲波。又或九累或機梭。誰歟先手爭一著。奇正奚必孫吳多。公輸斲木以錢肖。圍之徑寸賽初荷。此疆彼界畫方幅。鴻溝雖割爭渡河。帳中坐鎮惟將帥。士或豫讓相甘羅。馬逸車驅百蹂躪。飛礮直欲驚鳴馳。勁卒有進率無退。橫行莫遣敵

武定詩續錄 七
人過然後長驅大深入。譬蠟搜窟捕林窠。須臾得勝競奏凱。敗者不利虞兮何。心知當局固戲耳。奚啻戰血塗青莎。拂衣舍去不再計。天風一曲彈雲和。

圍棋用前韻

洶然助勢海揚波。雷雨飛起壁間梭。翻手覆手別黑白。取數直做周天多。開平劃出千夫井。三點兩點珠凝荷。遲之又久布子滿。遽成大勢傾長河。有時株守營兔窟。稀笑竟出難包羅。有時突圍作驕語。荆棘那許埋銅駝。又有天塹兩隔絕。能者偏以輕舫過。迷離撲朔雄雌見。拂枰一一翻白窠。重瞳鴻溝不自保。湘

東一目將如何。新其壁壘思再鬪。振羽奚啻雞名莎。推枰一笑頓足起。吾錯此著不然和。

江郎山

劈空斲削青琅姿。三礪拆墮紛葳蕤。千仞壁立雲霄起。神秀奧衍峯巒奇。繡色斑駁紺碧暈。頰如鼎趾連尻睢。又如抗峙當闌右。右拱左辟中紳垂。流俗品目播遐邇。動稱故老傳聞詞。云是江氏伯仲叔。雲根立化肩相隨。山足儼然隆廟祀。壁上鐫刻銘在茲。江家兄弟昉何代。毋乃未闢鴻濛時。不然茲山萬萬古。安有族姓詳宗支。山頭光明占吉兆。賸夫集中曾言之。天外瞻矚

生肅穆聊用作歌誌闕疑

連江署觀劇演周忠介軼事有感

昔過吳門揚風梳。虎邱山下偶徘徊。短章憑弔五人墓。大義撮
舉詞未該。優孟衣冠假面目。寫生使我肝腸摧。緬維勝國熹皇
日。太阿倒置如嬰孩。門生天子有魏監。權操威福誰能裁。譬如
窮奇猙口眼。逐人而食甘豹胎。顧厨俊及膏斧鑕。羅織搜盡非
凡才。偉哉吏部周忠介。東山望重儕伊萊。鴻飛冥冥何所慕。無
爭於世詎嫌猜。鉤黨頗類唐白馬。矯詔奚啻宋金牌。逡巡畏縮
諸長吏。噤不一語洵駑駘。詎知直道留閭巷。義憤直障狂瀾迴。

肩摩市人百千萬。啜其泣矣盈瓊瑰。東廠誰歟敢擅殺。尙方恨
不揮頤頰。虎頭壯士衣短後。十手決起驚風雷。五步之內賈餘
勇。慷慨何知魏與崔。嗚呼此舉雖快意。義之首者罪之魁。正氣
乍伸秀實笏。碎骨何惜鉏麈槐。南八男兒身死耳。忠肝和血濺
黃埃。諒爲毅魄想列祖。獨伸大義慚柏臺。君不見天道好還實
恢恢。曾不旋踵冰山頽。重陰曠曠霽以開。生祠廢址生蒼苔。羽
窟無底幽黃能。乾兒義子安在哉。銅駝誰與泣寒灰。年來年去
姑蘇臺。惟有五人之墓長崔嵬。吁嗟乎惟有五人之墓長崔嵬。

上灘行

建谿之水鼓山高。此語雖俗非空嘈。不見水關以上蜿蜒數百
里。節節灘聲亂人耳。一灘勢壓一灘危。舟子船頭蹙如鬼。牽纜
三五結成羣。四體跼伏首銜尾。齊聲號咷噍以哀。汗血迸流不
踰咫。有時劈空斬斷太白旗。壯士掀翻亂石裏。雷轟電掣退何
駛。性命須臾薄如紙。逆水行舟自古難。濶平水面足盤桓。難中
之險更如此。勸君切莫行上灘。

麴生歌

罵座將軍好使酒。不如戒飲占无咎。但苦鬱鬱懷抱未可開。此
際誰能復噤口。君不見獨醒枯槁楚大夫。又不見髡心最樂母

論石與斗。須知不飲者苦飲者豪。一醉要趁今朝有。眼前誰與
量交情。濁賢清聖皆吾友。麴生歌吟一篇。小酌破孤悶耳。執舞
蹠躡。不願生作萬戶侯。但願司業時時送酒錢。香醪密甜少陵
語。伯倫婦口空喧闐。撥棄一切謀痛飲。吾欲與汝以此全其天。
吁嗟乎吾欲與汝以此全其天。

春日早行

春意看如許。朝寒尙若斯。風尖人怯語。冰淺馬頻嘶。烟樹連村
暗。雲山逐日移。前途多鄭重。無負素心期。

雨阻許墅關

許墅岸傍岸。人家樓上樓。祇疑天在水。總有雨隨舟。喚渡應無策。開窗不散愁。江禽雙翅拍。橫翦縠紋流。

開元寺

小憩寓禪房。隨時愛景光。山幽雲傍戶。林迴月窺牀。竹色宵增潤。松陰晚納涼。無人知此意。天影碧茫茫。

聞同年劉副憲湄訃音

曾云歸志決。約我飽登臨。那識青雲客。先傷白雪吟。亂蛩三疊韻。哀雁九秋心。海上成連子。從茲不鼓琴。

詩文皆寄迹。結契在盟心。君本冲霄鶴。余爲入爨琴。從今傷絕

調。何處覓知音。恨少雙飛翼。生芻一奠臨。

登岱 鈔二

靈氣東來接碧霄。岱宗名號一尊翹。烟迷齊魯餘青翠。峯列兒孫悉拱朝。千里江河通地脈。半天雲雨鼓山腰。猶傳至聖登高處。練影吳門望裏遙。

霞明金闕起中峯。望斷天門瑞靄封。大地有聲皆動壑。深山何處不聞鐘。宏開神府三千界。高聳丹梯十八重。仰視前途摩踵頂。畫圖重累是連蹤。

三天門層級直上。前後人頂踵相接。應邵謂畫重累人。

學署卽事

武定詩集 卷二十一 十一
幾度春風振羽翰。重來養翮蒞文壇。浮沈歲月消磨易。尺寸功名報稱難。藥椀茶鐺無長物。詩魔酒債有餘歡。家藏世業青氈在。誰道先生是冷官。

豈必桃源是隱淪。鱸堂閫寂絕風塵。步趨也許隨冠冕。姓字何勞挂搢紳。坐擁圖書堪破悶。偶謀升斗未全貧。勉將遺業三冬用。羞憶前年獻賦人。

聯萼堂前憶舊居。天涯海角乍分裾。離情莫問雲中雁。樂趣須參濠上魚。東海栽桃應有望。南山種豆竟何如。偏將寸晷風檐事。夢寐頻來賦子虛。
時仲濤弟應鄉試

登蓬萊閣

山巔危構自何年。曾向思容句裏傳。檐外鉦懸滄海日。欄前劍倚白雲天。千帆破浪疑排陣。五島浮空盡化烟。乍洗煩襟胸次曠。凌雲呼吸欲通仙。

養文石

水借菁華石借明。塵根不著道根生。盪成大小方圓質。歷盡古今潮汐聲。雪浪照人都眼淨。冰壺對汝乍心清。晚來小立方池上。欲數涵星月未傾。

月夜舟行

武定詩集

卷二十一

三

皓魄銜山夜正中。布帆懸處若浮空。三更天挂如弓月。萬里人
乘破浪風。匹練平拖千頃白。深林遙指一鐙紅。泊舟關下推窗
望。黑腳垂雲已壓蓬。

仙霞嶺

崎嶇詰曲叫鉤輞。巖厂雲深古木稠。合杳烟巒隨處轉。混茫世
界望中收。叢祠想像風馳馬。拾級依稀月喘牛。劍閣函關同扼
要。徘徊遺蹟景先猷。

文襄公平耿
變舊蹟猶存

山似蠶叢開鳥道。懸崖側足入崆峒。峯高人語層霄外。磴轉天
浮曠野中。怪石當關疑魍魎。飛湍激浪走霓虹。深篁密樹無邊

際。連日塵囂一洗空。

宋李忠定公祠

河嶽鍾靈出偉人。運逢陽九費艱辛。望風早禱豺狼魄。射影難
消鬼蜮瞋。兩代恩榮叨異數。七旬鈞軸歎孤臣。滿腔忠義千秋
恨。奕奕丹青耀紫辰。

夜坐有感

安眠飽食戴堯天。茶蓼何期雨露偏。久臥帆檣忘宦海。小貪豐
穰力書田。敲門偶有催詩客。沽酒差無造孽錢。喚醒浮生蕉鹿
夢。知非恰合憶前賢。

身世浮沈類轉蓬。塞翁何必問窮通。星槎到岸回頭是。海市成樓轉眼空。莫向滄桑尋大劫。且耽文翰息勞躬。故山猿鶴如相問。守璞全真是此翁。

春興

昨夜東風到敝廬。梅花消息問何如。歲寒過後餘冰雪。鄉味嘗來近筍蔬。半格偶規長慶體。一樽誰叩子雲居。陽回依舊窮愁甚。漫道虞卿好著書。

看予意氣久飛騰。名噉詞場少日能。知己僅存矜魯殿。虛聲浪得愧韓陵。瘦如病鶴秋驚露。苦向微蟲夏語冰。坐對春盤思往事。幾回眉後起雙棱。

紫陽仙人樓

赤城仙迹久荒涼。數仞巍然峙畫堂。函谷已難留柱史。邯鄲猶記遇純陽。乾坤鑪在誰傳火。龍虎丹成豈用方。讀罷悟真無悟處。還從道德問津梁。

秋蟬

西風庭院動清商。一樹無情送晚涼。斷續聲中兼落葉。炎暄閣後賸斜陽。本居廉潔身將隱。似共窮愁話亦長。聽到別枝還咽住。幾回徙倚井梧傍。

贈王逸芬

名永昌邑諸生六旬潦倒邂逅接談知其奇才未遇也惜之

半瓢日月百愁無披褐山人號古愚一點寒燈昏壁外讀書白盡老頭顱

比居五里昧生平一笑相逢倒屣迎斂器若無堂下語誰能執手識饒明

蝶子蜂兒渾浪猜尋香鎮日到豐臺誰知一樹天孫錦慣向秋山冷處開

李華

先大父字西山號蓮峯廩貢官京山知縣贈翰林院

編修萊陽初頤園大司馬京山知縣李公傳李君始遷世稱李神仙事載省志又三傳生仙鴻臚寺序班精數學終茂州知州愉生嘉猷增貢官柳州府通判為君之父君五歲喪母悲泣如成人歷事繼母咸能得其權心以廩貢肄業太學考取瞻祿補史館獲敘選湖北布政司經歷楚北教匪蔓延被擾者四十餘州縣軍書旁午大吏議立局繳君主收發支應閱五年局撤敘勞不及君君亦勿言其在局也言於上官曰餉銀存庫不必移局利所在多經一手多滋一弊局去庫甚近餉至局給文交於庫領者局給文發於庫免一經手免一弊矣上官善之行五六年前所省銀以兩計約二十餘萬他人有以虧局敗者人皆服君識見之明京山號稱難治上官遂以君知縣事力除不便於民數事餘仍其舊不事更張

不為急遽禮文學之士以培養書院為先務修葺湖隄
 用河工搶險法數年邑無沖潰患已已大水沿江州縣
 均被淹而京山無恙制府查災過之以搶險法上制軍
 即以其法示有隄諸州縣命效之尋權漢陽同知京山
 人咸望君還年已六十六力請退邑人以聯語獻曰百
 姓望君如望歲大儒憂道不憂貧上官知之命回京山
 任甫一年以繼母陳氏在堂告養歸里歿後鄉人士謚
 曰端恪余幼時與君同學於樂源書院見其舉止言貌
 契而重之後得其立品居官之詳卓卓如是誠於
 中者形於外振拔流俗其始必有以異於人也

花朝偕吳南池及弟萊峰飲石漁春存吾軒分韻得小飲

二字

今日是花朝。花萼含尚小。簾捲春雨寒。窗對春山曉。
 問花花未開。沽酒酒共飲。興到偶題詩。或入司空品。

渠展懷古

濟水赴海流。急如離弦矢。強哉齊桓公。富國從此始。我來引領
 望。霽色滄溟裏。一登黃蘆臺。一想齊管子。管子不復見。渠展猶
 在耳。憶昔圖伯時。烟火幾千里。府海饒魚鹽。美利誰與比。試出
 鐵門關。漉沙留舊址。表海稱雄風。雄風今已矣。可惜天下才。遺
 業僅如此。

雨中寄懷諸弟

久客春日長。難忘離別苦。況復高館寂。獨坐寡傳侶。明滅巫山
 雲。斷續巫江雨。雲雨空濛中。聲聲聞杜宇。杜宇似催歸。令我懷

正定詩集卷二十一
鄉土何來故鄉人。凌晨欵入戶。對之三歎息。恨無雙飛羽。

閨思 鈔一

妾有千里夢。君懷尺素書。君書妾未見。妾夢向誰攄。

嗜古堂題壁

鎮日開編處。堂宜嗜古名。每當明月上。恰有好風迎。人靜三更
永庭虛萬籟。清隔簾花弄影。彷彿助詩情。

瓶花

小瓶花亂插。斗室亦生香。素影侵書幌。低枝壓筆牀。眠宜清夢
境。坐對好春光。爲惹尋芳蝶。踟躕過草堂。

書齋題壁

獨坐清齋裏。公然極樂鄉。人間消晷永。心靜識花香。披誦書千
帙。臨摹字幾行。端居無箇事。得句更題牆。

晚次湖口縣

客路三千里。偶臨湖口城。漁村時隱現。雉堞不分明。波撼江天
影。潮兼風雨聲。孤舟眠未穩。永夜故鄉情。

戊申重陽前三日。法時帆學士式善招同人遊極樂寺。卽

景分題拈韻成十二律 鈔四

勺亭 限刪韻

乾坤如許大。俯仰一亭間。入座聞飛瀑。推窗對小山。圓通皈佛妙。疏懶愛僧閒。擾擾塵中客。浮情到此刪。

假山 限鹽韻

平生邱壑愛。拳石亦何嫌。坐看峯巒疊。圖疑水墨兼。斜陽三面透。瀑布一痕添。遙指西山影。層層合玉尖。

樺菊 限豪韻

漫說東籬菊。關情但屬陶。尋宜秋雨盲。品對晚風高。有酒詩先就。無花興亦豪。閑時還有約。重訪定相遭。

枯荷 限元韻

采采歌聲遠。殘荷蓋尚存。魚遊難匿影。鴛夢尚留痕。潦淨寒塘水。霜侵老瓦盆。纖塵終不染。歲歲託靈根。

上元前二日雪霽煦齋學士英和邀同人集藜香書屋分體得七律二首 鈔一

燕山雪霽淨無塵。雅會同將雅意伸。滿座衣冠新歲月。當筵詩酒舊朋賓。張燈已近傳柑節。入幕還生廣廈春。彷彿羣仙蓬島聚。人間天上總前因。

清明遊武侯祠并至白帝城

清明佳節事遨頭。蜀國風光一望收。南北巫峯千萬疊。去來巴

水古今流。武侯祠外餘殘壘。白帝城邊半故邱。滿目蕭條人迹少。輕花落麥徧青疇。

壬申春遷任漢臯京山紳耆公餞賦此留別

承乏京源幾度春。過從盡是素心人。多承蘭味情投我。詎有棠陰惠及民。年例扶鳩新歲月。行裝載鶴舊清貧。他時見憶如相訪。江上寒梅認比隣。

蜀道雜詠 鈔二

峭壁山前雨意濃。朝陽洞外白雲封。行人漫說襄王事。已過巫山十二峯。

茂林陰翳是花橋。直上雲梯萬仞高。碧落紅塵應不隔。回看身已近層霄。

紫林鋪旅夜

紫林鋪裏度寒宵。旅店孤鐙伴寂寥。一枕雞鳴驚客夢。小蘭橋畔雨瀟瀟。

大霧過十盤山

衝霧凌晨過十盤。行行不辨路漫漫。可憐身世多如此。何必分明子細看。

題畫

招尋秋色過橋遲。曳杖斜陽小立宜。好是青山紅樹裏。一行人
字雁來時。

清明九江遇雪

雪裏清明住客舟。卻將春色付寒流。翻新一幅江城畫。昨夜青
山今白頭。

運河舟中書所見

曉漲初平泛釣艫。晨光隱約透篷窗。漁人櫂入烟波去。驚起鷗
眠四五雙。

殘虹數里映明霞。村樹重重掩映遮。向晚舟行圖畫裏。夕陽紅

上荻蘆花。

七夕見糧船迎婚戲成絕句。

誰家簇簇擁紅妝。權把糧船作洞房。今日天河牛女會。笑他烏
鵲駕橋忙。

盆荷

花花葉葉露珠溥。眞把芙蓉鏡裏看。昨夜月明人不寐。清香風
送玉闌干。

李魏

從叔祖字秀峯號蓮浦。先高祖孫廩貢官江都知縣。祖

由廩貢考取謄錄史館議敘歷任江都桃源知縣署海州知州揚州同知工文章而詩傳留者不多

穆陵關

霸業今何在。雄封萬古存。遺風誰問訊。落日又黃昏。曲徑連雲沒。飛泉帶石奔。幾家烟樹外。荒落不成村。

嶽雲亭

幾重丹嶂倚飛梯。對面名山盡覺低。翠靄有痕分泰岱。蒼烟無路辨青齊。階荒蔓草碑跌沒。壁老秋霖句尾迷。看取盪胸雲起處。杜陵佳句好留題。

渡江

江干柳色認參參。醉倚篷窗睡正酣。柔櫓一聲春水濶。載將殘夢過江南。

李 嶢

叔祖字萊峯。號次園。先高祖孫。附貢官。無為州同。歷官涇縣合肥縣丞。無為州同。喜為詩。舊有詩草一帙。不下數百首。藏於家塾。今編覓不可得。僅從友人處抄得三首。又憶得一。首並存之。

中秋

皓魄團圞映畫堂。誰家笛韻聽悠揚。每逢深夜詩情好。自到中秋酒興狂。白露方濃蓮葉老。金風吹送桂花香。高吟爛醉渾無

事一夢華胥忘漏長。

遣懷

蓬矢桑弧志四方。浮生到處是家鄉。登山臨水神仙界。問柳尋花歌舞場。漫向風塵誇捷足。詎將名利結愁腸。今宵暫作吳陵客。酒陣棋兵引興長。

秋夜

宵深寂靜木樨香。獨坐蕭齋納晚涼。半百人如秋漸老。萬千愁與夜俱長。蟲聲斷續驚鄉夢。蟾魄淒清淡宦腸。譙鼓三敲眠未穩。閒看螢火上東牆。

園中卽事

小園閒眺助詩情。卻向東風背手行。新綠一畦初過雨。春芽亂茁不知名。

| | |
|--|--|
| | |
|--|--|

